



CELEBRACIÓN EN OS COTOS

17-18 de maio do 2025

V SEMANA DO TEMPO DA PASCUA



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,
E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 *nº 1 A Cristo cantamos*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

Seguimos a facer o camiño da Pascua dando pasos tralas pegadas de Xesús, o noso Bo Pastor, e hoxe atopámonos coa encomenda á que El nos convida: “amádevos uns a outros coma irmáns, como eu vos ameí, pois nisto coñecerán que sodes os meus discípulos”.

- * Amor a nós mesmos coidándonos
- * Amor aos que están á nosa beira sendo agarimosos e respectuosos
- * Amor aos veciños e veciñas facendo parroquia de paz
- * Amor á terra na que estamos, que nos dá o que necesitamos para vivir, e á que non temos dereito a maltratar e estragar
- * Amor á Igrexa que nos fai comunidade
- * Amor a nosa historia galega, e orgullosos coa lingua das nosas xentes e dos nosos antepasados.

Celebramos esta grandeza de amar e ser amados.

ACTO PENITENCIAL

Celebrante: *Pero a nosa vida está chea de atrancos que non nos deixan camiñar alegres e pesan no noso corazón. Para poder ser vida de Pascua temos que pedir perdón recoñecendo que non sempre facemos crible este mandamento de amar:*

Monitor/a

- ✓ Pedimos perdón polas veces que somos exemplo da irmandade á que ti, Señor, nos convidas. Señor ten piedade de nós
- ✓ Pedimos perdón polas veces que só nos amamos a nós mesmos, e cremos que o único que importa é que cada quen vaia ao seu. Cristo, ten piedade de nós
- ✓ Pedimos perdón polas veces que querendo ou sen querer facemos da fe un camiño de palabras con rutina, lonxe da encomenda que ti, Señor, nos propós. Señor, ten piedade de nós

Celebrante: *Deus, Pai agarimoso, ten piedade de nós, dos que teñen un lugar no noso corazón e na nosa vida, dos que se atopan sos e perdidos no camiño sen descubrir que amar vale a pena. A todos concédenos o Señor o perdón dos pecados, a todos ábrenos os ollos á súa Pascua e a todos por Cristo Resucitado nos leva á vida eterna. Amén.*

🎵 **nº 3 Gloria**

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior. Facémolo doídos e necesitados de paz, e facémolo coa encomenda que nos dá Cristo con quen hoxe dicimos que amar vale a pena.*

(Silenzo)

Celebrante: Señor, noso Deus, Ti enviaches o teu Fillo para redimírnos e facernos fillos teus.

Mira con amor de Pai aos que cremos en Cristo, dános a verdadeira liberdade e a herdanza eterna, e aléntanos para facer realidade a encomenda do teu Fillo: amarnos uns a outros coma irmáns.

Pedímoscho por El mesmo, que Resucitado vive e reina por sempre eternamente. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *O Libro dos feitos dos apóstolos vainos amosando que os primeiros cristiáns espallan a experiencia de Xesús achegando a igrexa a todas partes.*

O Evanxeo de Xoán que hoxe proclamamos é por unha parte o mellor resume da vida de Xesús: “Amou coma irmán”, e é por outra parte a tarefa que nos encomenda para sermos cribles: Amarnos uns a outros coma irmáns. Escoitamos porque esta palabra é para nós.

LECTURA DO LIBROS DOS FEITOS DOS APÓSTOLOS

Daquela, Paulo e máis Bernabé volveron para Listra, Iconio e Antioquía, enfortecendo o espírito dos discípulos e animándoos a perseveraren na fe, porque -dicíanlles- temos de pasar por moitos traballos, para entrarmos no Reino de Deus. E despois de designarlles presbíteros en cada Igrexa, oraban, xaxuaban e encomendábanos ao Señor, en quen creran.

Atravesando a Pisidia, chegaron a Panfilia e, logo de anunciaren a palabra en Perxe, baixaron cara a Atalía. De alí embarcaron para Antioquía, desde onde foran confiados á graza de Deus para a misión que viñan de cumprir. Chegando, reuniron a Igrexa e contaron todo canto Deus fixera con eles e como lles abrira aos pagáns a porta da fe.

Palabra do Señor

🎵 *nº 8 No colo da miña nai* SALMO

(en pé) Leccionario I C páx 147 Xn 13, 31-35 EVANXEO

PROCLAMACIÓN DO SANTO EVANXEO SEGUNDO XOÁN

Daquela, dixo Xesús:

- Agora queda glorificado o Fillo do Home e Deus queda

glorificado nel. Se Deus queda glorificado nel, tamén Deus o glorificará a el e hao glorificar axiña. Meus fillos: só un pouquiño estarei convosco.

Douvos un mandamento novo: amádevos uns a outros; como eu vos ameí, amádevos tamén entre vós.

Nisto coñecerán todos que sodes os meus discípulos: se vos tedes amor uns a outros.

Palabra do Señor

(sentad@s) gardamos uns instantes de silencio para acoller a palabra no corazón



Celebrante: *Fixemos memoria do noso bautismo na celebración da vixilia pascual. Alí compartíamos a auga de toda a comunidade de Os Cotos, e agora aquí ante a auga de vida que nos une en parroquia, queremos lembrar os compromisos, queremos sentirnos confiados en Deus, queremos ser a COMUNIDADE que ten a Cristo coma o irmán que nos ama.*



BENDITO SEXAS POR SEMPRE SEÑOR

- * Deus creador de todas as cousas, que pola auga e o espírito, nos fixeches renacer á vida do evanxeo
- * Xesús, Ti que convidaches á primeira comunidade a ser testemuña anunciando o evanxeo a todas as xentes
- * Espírito Santo, que fas renacer á Igrexa polo alento da Pascua, e que nos convidas a ser auga viva

Celebrante Neste tempo da Pascua, deixándonos
alumar pola luz da fe que recibimos no bautismo,
renunciamos ao mal porque queremos facelo mellor.

- Renunciades a crervos superiores aos outros; isto é: a calquera clase de abuso, discriminación, orgullo, egoísmo e desprezo?

○ Renunciades a calar diante das inxustizas e as necesidades das persoas e dos pobos, por covardía, preguiza, comodidade e vantaxes persoais?

- Renunciades aos criterios e comportamentos que fan do diñeiro a aspiración máis grande da vida, e que aprecian a liberdade persoal e o individualismo por enriba da responsabilidade social e da comunidade?

Esta é a lei

Amor a Deus

Amor aos demais

Amor ao próximo



PROFESIÓN DA FE

Celebrante Neste tempo da Pascua, deixándonos
quecer á beira do RESUCITADO compartimos o
credo dicindo **SI CREEMOS**

Monitor/a:

Credes en Deus,
Pai e Nai de todos os homes e mulleres,
que nos agarima nas súas mans
e que conta con nós para mellorar a vida?

SI CREEMOS

Credes en Xesús, o seu Fillo Benquerido,
sempre atento para dar unha man,
e que nos quere dando vida á Pascua
co noso bo facer de cada día?

SI CREEMOS

Credes no Espírito Santo,
que nos alenta esperanza para soñar irmandade,
que nos alenta forza para doernos coa violencia,
que nos alenta paz para sementala por toda a Terra?.

SI CREEMOS

Credes na Igrexa,
unha Igrexa que se fai crible en comunidade,
acolledora, respectuosa e coidadora da terra
e da vida de todas as mulleres e homes
que non contan para ningún?

SI CREEMOS

ORACIÓN UNIVERSAL

Celebrante: O Señor Xesús, é o irmán que nos ama.
Poñámonos nas súas mans para que sexa el quen nos
encamiñe na fraternidade, e nós sexamos quen de
seguilo. Rezamos coa nosa oración da Pascua dicindo
SEÑOR DA VIDA, ESCOITA A NOSA ORACIÓN

Monitor/a:

✓ Señor, porque somos comunidade, queremos orar
polos veciños e veciñas que damos vida e facemos crible
a nosa parroquia. Oremos

✓ Señor, porque somos crentes no rural, queremos
orar polas xentes das nosas aldeas, pois non sempre
somos tratadas con dignidade. Oremos

✓ Señor, porque somos galegos queremos orar
agradecidos e orgullosos da nosa fala, da nosa terra, da
nosa historia, dos nosos antepasados. Oremos

✓ Señor, porque somos igrexa na Unidade Pastoral de
Os Cotos, queremos seguir facendo crible unha fe
acolledora e coidadora. Oremos

✓ Señor, porque somos crentes da Pascua, queremos
facer noso o teu desexo de paz e de amarnos uns a outros
coma irmáns. Foi o teu evanxeo e é o noso. Oremos

Celebrante: Señor Xesús, que saibamos recoñecerte na
comunidade dos irmáns e irmás, pedímoscho a ti que
vives e reinas Resucitado por sempre eternamente. Amén

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: Temos escoitado a Cristo, o noso IRMÁN, por iso rezamos a Deus Pai como o temos aprendido do mesmo Xesús:

NOSO PAI ...



SIGNO DA PAZ

Celebrante: A proposta que nos fai hoxe Xesús, o Bo Pastor, é a de amarnos uns a outros como El nos amou, porque nisto coñecerán que somos os seus discípulos. É verdade que non é unha encomenda calquera, é a que se nos dá en PAZ para facer camiño de Pascua. Sexamos nós, hoxe e sempre, homes e mulleres cribles dando exemplo de paz.

🎵 **Fagamos a paz irmáns**

COMUÑÓN

Celebrante: Pola man dos apóstolos aquela primeira comunidade botaba a andar abrindo as portas como igrexa para todos. Nós compartimos unha mesa en comunidade como signo dunha vida toda ela compartida, no que temos, no que somos, no que amamos, no que valemos. Ditosos nós, irmáns, convidados a esta festa da Pascua do Señor.

Señor, eu non son merecente de que entres no meu fogar, mais unha palabra túa abonda para me salvar

🎵 **nº 9 Acharte presente na vida**


4.- AVISOS E DESPEDIDA

ORACIÓN FINAL

Celebrante: Señor, aléntanos con bondade ao teu pobo. Ti que nos iluminaches con esta celebración compartida, fainos entrar na vida nova da túa graza, para que coas nosas palabras e os nosos feitos sexamos testemuñas do amarnos, uns aos outros, coma o teu Fillo nos amou.

El que vive e reina Resucitado para sempre eternamente. Amén

UNIDADE PASTORAL D'OS COTOS



FELICES FESTAS DA PASCUA

Avísase das misas (ver folla do mes)

Que teñamos unha boa PASCUA, e o Señor nos bendiga †, nos garde de todo mal e nos leve ao seu fogar de vida eterna. Amén

Podémonos ir en paz. Dámoslle grazas a Deus